

MIAMI ART WEEK

December 2 – 8, 2019.

Prome parti di un articulo tocante e evento global di arte na Miami
Pa: Stan Kuiperi / ArtViews Aruba.

PA trinta y pico pais di region Caribe, Miami semper a hunga un papel prominente como destinacion pa compras, entretenimento, y estudio. Hopi isla hasta ta modela nan mes segun e ‘estilo Miami’ pa nan industria turistico. Sinembargo, p’esnan cu ta mira mas leu cu ‘sun, sea and sand’, e Miami Art Week ta un mecca cultural y un fuente di inspiracion directo.

Un ehempel di esaki t’e Wynwood Art District cu a forma e berdadero start p’e actual Murals Project di Aruba na San Nicolas. Den e sentido aki tambe Miami a asumi e papel di lider den region, demostrando con ta transforma turismo di ‘drumi-na-beach’ den un turismo cultural dinamico y creciente.

E evento di arte di december ta wordo yama na diferente number, p.e. ‘Art Basel’, ‘Miami Art Week’, ‘Miami Art Fair’, etc. Tur esaki ta corecto en parte. Aki ta usa Miami Art Week como number colectivo pa tur e eventonan cu ta tuma lugar.

E evento ta un reunion impresionante di varios ‘art fair’ (otro number copia na Aruba) hopi grandi den pavillon y convention centrenan, exposicionnan den galeria, museo, bario y hotelnan, presentacion, performance, concierto y cinenan di arte, y discusion, lectura y presentacionnan di bukinan di arte.

Miami ta trece hunto artista, coleccionistanan y publico amante di arte local y internacional, pa cumpli cu un meta grandi: Expone, mira y cumpra arte.

Henter siman tambe lo tin mas evento ‘satelite’ manera recepcion, dinner y fiestan.



©Art Basel Salanan di galeria na Art Basel, Miami Beach, 2019



©Art Basel

E evento di 2019 lo cuminsa dialuna 2 di december, y lo sigi te cu diadomingo 8 di december. Mas di 1000 galeria for di tur continente lo participa den 18 feria di arte, y converti Miami den e Centro di Arte di mundo. Y ya cu ta celebrando e di 30 edicion, Miami Art Week lo ta extra festivo e aña aki.

E articulo aki tambe ta pa yuda comprende e evento y planea un prome bishita. Tur actividad ta tuma lugar casi pareu den henter Miami, y bo no por scapa di core di un parti pa otro durante e 7 dianan di e evento. Mester tene cuenta cu distancia entre hotel y e sitionan, y cu trafico. Miami ta keda Miami.

Debi n’e grandura di e evento, Miami Art Week por confundi e bishitante cu ta bay pa prome biaha. Pa planea un bishita practico, ta bon pa parti e areanan di actividad den dos: Miami (City, inclusive downtown), y Miami Beach.

E art fairnan na Miami ta: Art Miami/Context Art Miami, Miami River Art Fair, NADA Miami, Pinta Miami, Red Dot Miami, Spectrum Miami.

Na Miami Beach tin: Art Basel Miami, Design Miami, Art Now Fair, Scope Miami Beach, Aqua Art Miami, Ink Miami, Pulse Miami Beach, Superfine! Miami Beach. Pa tur informacion specifico encunto programacion, espacio, horario, entrada, etc., ta mihor pa busca tur exposicion y guianan online (p.e. art-collecting.com) pa obtene tur informacion corecto y actual.

>>



Sala di exposicion na Art Miami Pavillon.

SK

Debi na limitacion di espacio, lo menciona e art fairnan mas grandi pa duna un bista di nan contenido.

ART BASEL (Miami Beach)

E mundo di arte na Miami a tuma un paso grandi dilanti na 2002 ora cu e fair yama Art Basel a expande for di Europa y a cuminsa su trayectoria na continente Americano tambe. Art Basel a cuminsa na Basel, Suiza, na 1970 como proyecto alternativo di tres galerista pa trece hunto e artista, e coleccionista, y e publico.

Art Basel a expande pa Hong Kong tambe na 2013, y awendia ta creciendo continuamente cu proyectonan manera Art Basel Cities na Buenos Aires, y otro proyecto manera na Dubai.

E di 18 edicion di Art Basel Miami manera costumber lo ta instala den e Miami Beach Convention Center, cu ta transforma den un ciudad di arte cu mas di 80.000 bishitante (2018) den un siman. Mas di 260 galeria internacional lo presenta obranan di 4000 artista visual di cada disciplina, media y tecnica existente, tur cos bou un solo dak.

Art Basel mes caba ta consisti di 8 diferente sector, cada un cu un concepto un poco diferente. Cada sector ta inclui un cantidad di galeria di arte, dependiendo di e tipo di arte y artista cu cada galeria ta representa.

‘Nova’ ta presenta galerianan cu 3 artista cu obranan di e ultimo 3 añanan. ‘Positions’ tin galeria cu un artista so cu un proyecto grandi. ‘Edition’ ta presenta casnan publicitario cu ta colabora cu artistanan pa crea buki, etc., di arte. ‘Meridians’ ta presenta obranan monumental, hopi grandi y inovativo cu no ta cuadra cu presentacionnan regular di galerianan, y tambe films, performance, etc. ‘Films’ ta trece un cantidad di filmnan special tocante y di artistanan y nan trabou.

‘Survey’ ta presenta proyectonan encuan to historia di arte, y exposicionan tematico di artistanan di diferente origen y cultura.

‘Publications’ ta presenta hopi diferente publicacion mane-

ra buki y revista di arte den forma di stands, y ‘Conversations’ ta un plataforma cu discusionnan publico encuan to arte presenta pa un cantidad di experto riba e tereno di arte.

ART MIAMI


ART MIAMI (downtown) tambe ta un di e art fairnan mas prestigioso, original y cu e historia mas largo na Florida. Mas di 125 di e mihor galerianan internacional di arte contemporaneo lo muestra un variedad grandi y impresionante di arte di e calidad mas halto na mundo. Bishitantenan lo experencia e obranan di arte mas recien cu ta forma e vanguardia di e movimiento di arte di nos tempo.



Pavillonnan di Art Miami and Context na downtown Miami

CONTEXT

CONTEXT ta wordo considera un “sister fair” pa Art Miami, y ta situa banda di esaki. Pavillon di Context ta acomoda 75 galeria internacional cu nan exposicion solo of colectivo, mas tanto di artistanan emergente of den medio-carera. Context actualmente ta den su di tres aña, y tin un ambiente mas habri y relaxed.



Sala di galeria na Context, Miami. WK.

Fin di prome parti. Lo continua cu parti dos den un siguiente publicacion di AWEMainta.com